



Bájkkeavijssa NuorttaSálto

Tæksta: Børge Strandsko
Járggáibme: I dar Kintel



Buktagis oahppe: Gåro bieles ávdemusán, Kristine girjetsaggiin ja Ailo bijlajn. Gåro bieles mañnelin Alvin, Isabel ja Preben. **Produktive elever:** Foran fra venstre, Kristine med bokstøtte og Ailo med bil. Bak fra venstre Alvin, Isabel og Preben.

Tjavnjas 2006 sjattaj teknologija ja hábbmidibme oassen oahppoplánajs luonndofágan, duojen, ja aj matematiikan. Fáhka le arvusmahtám oahppiit ja áhpadiddijit Måskén vaj dajna li guhkev barggam...

- Vuojnnet oahppe lij riek buoragit dáj prosjevtaj soapptsum, javllá Måske skávlá rektor, Gunnar Solstrøm.

Prosjæktabarggo, gánná fágaj rájáj rastá barggi, le oajvvebarggamvuohke teknologijan ja hábbmidimen. Tiebmá teknologija ja hábbmidibme le moattefágalasj tiebmá gánná luonndofágan, matematiikan ja duojen aktisattjat barggi. Oahppe oadtju moattelágásj hástalusájt juo ájádusás gitta buvta le gárves. Vierttiji ájadallat ja ávdánahttet buktagijt adnuj árggabiejven. Aktisasjvuohta luonndodieda ja teknologija gaskan le ájnas, ja luonndofágalasj prinsihpa le vuodon teknologiasj dájnav dádjadittjat.

- Lip riek dudálettja gá mijá skávlá le vuostasj mijá guovlon mij le dáv prográmmafágav adnuj válldám. Oahppe li fágajn álles dálvev barggam ja vuojnnet dajna soapptsu, javllá Måske skávlá rektor Gunnar Solstrøm.

Preben Johnsen 5. klássan le riek dudálasj. - Mán riek buoragit dási lijkkujiv, lij suohtas ájádusájn stáhkát ja buktet juojddáv dassta. Vuostatjin jáhkkiv dássjedis áhta galgaj sjaddat, valla ajtu juojddá sjattaj, javllá sán.

Oahppe 3. – 10. klássajn li dahkam girjetsaggev, uksakloahkov, serviehtta-bisodiddjev ja bijlav. Vuostatjin barggin ájádusáj gáktu sijá bijla galggin sjaddat. Dan mannela páhpermodellav hábbmijin, ávdvál praktihkalasj barggij álgin duola dagu suoddamijn ja sájudimijn plástas. Gá karosserija lij gergas, vierttijn elektronikallattjat ja mekanikalattjat barggát. Oahppe mihttijn plána milta, gánná motávrrá, bádnejuvlla ja ledniga galggin liehket. Vierttijn aj loaddit. Mañnela li oahppe sierra diedádusáv bargo birra tjállám.

Máhtti iesj materiálav válljit, valla dan diehti gá plássta le nav vuogas giehtadallat, de dav válllijma, javllá Solstrøm.



Ávkálasj árkabiejvvegávne. Fága matematiikka, luonndofáhka ja duodje aneduvvi buvta gárvedittjat. **Nyttige hverdagsting.** Fagene matematikk, naturfag og kunst og håndverk brukes for å komme frem til et ferdig produkt.

Hábbmimprosæssa le dagu bákká ájádusás gárves buvtaj, ja oahppe bessí dán ádá fáhkasuorgen hábbmit ja ietjasa teknologiasj buktagijt dahkat. Elektrihkalasj boarranábar, loaddaboallta ja ietjá vædtsaga aneduvvi. Elektrihkalasj oase biejaduvvi, hájggámmásjijna dagáduvvi ja gæhtjaluvvi, ja plásstapláhta sjaddi ávkálasj ja tjáppa adnogávnen. Skávlá áhpadiddje li kursan læhkám ja bukti oahppiit bagádallat.

Fága matematiikka ja luonndofáhka li vædtsakfáhkkan teknologijan ja hábbmidimen, madi duojen le suorra oasse praktihkalasj estehtalasj vuojno. Gá buktaga lidjin gárvvása, de li oahppe aj prosjæktadiedádusáv tjállám. Láhpan lij aj gilposvuodjem lásjmudallamlanján.

- Oahppe ettjin rat lijkku gá biejevve nágáj, ja vuojnnet lij gárvvása ádá dahkamusájda tjavnja rájes, hæjttá dudálasj rektor.